

Tiwei Pol Kewisik Ken Mitik Taitas

Menmen me tiwei ik

Pol katip Taitas him gude 1:1-4

Him me mit iuwe ninin naanmipre emit ne sios 1:5-16

Menmen mit miyapir ne sios nanisesim 2:1-3:11

Pol katip Taitas him mikaru 3:12-15

1 ¹Hi Pol hi hiriak menmen me God, Jisas Krais kehimitena hi aposel kirak. Hirak keriuweta hi hepno ekaap mit God kehimiteni hir mit nirak, te hir enises him mirak werek. Hi etpor him yaaim, te hir enirtei enises menmen me God. ²Hi ekaap mit hir nanises him me God nanmeriyiwek hirak kaknen kaktorhis, te hir nantikerek nanu nanit tipmain tipmain enum eik. God hirak kemipin au. Nipaa enum eik hirak kiriak ti wen au, hirak katip hirak hanhan mit nantikerek nanu nanit tipmain tipmain enum eik. ³^aHirak ketpim epei au, maain wi ham hirak kehimitanem, hirak kewepyapirem. Hirak kewepyapirem keriuwe him hirak kewetewem, te hi atip mit em. God katip hirak kaktaihis haiu mit keriyen, te hirak keweto him im hi atip mit em.

⁴^bTaitas, hi Pol hewisut tiwei ik kan. Ti nikan kai ke menmen me God haiu yapirwe misesim. Hi hanhan God Haai ketike Krais Jisas kerek kekepai kaktaihis, hirakit tatrekyut yaaim, te ti ehue werek werek.

Him me mit iuwe naanmipre mit ne weiwik me God

⁵Hi hinaiwirit ti hepu wit Krit, te ti eriak menmen ere werek nipaa hi hiriakem. Ti ehimitan mit iuwe naanempre mit miyapir ne weiwik me God nerer wit wit mar ke nipaa hi hetputem. ⁶^cMit iuwe nipaa ere in hir niriak menmen enum au, hir naanmamre mit miyapir ne weiwik me God keriyen. Hir neit miyapir niutip niutip keriyen. Nikerek nir enises him

^a 1:3 Ef 1:9-10; Ta 2:10, 3:4; 1Ti 1:1, 11 ^b 1:4 2Ko 8:23; Ga 2:3; 2Ti 1:2; 4:10; Ro 1:7

^c 1:6 1Ti 3:2-7; 2Ti 2:24-26

me Kraiss, te hir mit han ap nansiuwe him nantip nikerek nir niriak enum nises han kir weinim ap nemtau him me miye haai au emit! ^{7d}Mitik iuwe naanmipre menmen me God, te hirak nipaa ere in kiriak menmen yaaim. Hirak mitik enuk paan tokik au emit! Hirak ap han enuk waswas keriuwe menmen au emit! Hirak kaam tipar si enum ere ketaritari au emit! Hirak ketike mit han nenehan nenepan me menmen au emit! Hirak hanhan kakit pewek te han kenke kenterim au emit! ⁸Au, hirak ekikaap mit han nan neke wit hak, hirak hanhan ekises menmen yaaim. Hirak naanempre hirekes ekriak menmen yaaim ekises him me God. Hirak ekwenin han kirak te hirak eku werek. ^{9e}Hirak ekises him yaaim nipaa haiu metporem, te hirak kaktip mit kakikepi kakriuwe him im yaaim, hirak kakri han ke mit ap nises him yaaim, te hir nanirtei menmen enum hir nisesim.

Mit enun ne wit Krit natip him weinim nemipin

^{10f}Hirak ekriak menmen im ekintar mit yapirwe ein ne weiwik me God hir ninapen nemtau him me Kraiss. Hir natip me menmen weinim nemitetpin mit neriuwerem. Mit yapirwe nar ik hir nises him me mit kerek natip nar ik: “Yi eirekir yink ki, te yi yises him me God werek werek.” ^{11g}Hir mit nar ik nemitetpin mit neriuwe him mir im enum. Hir nari han ke mit miyapir nikerek nir niutip niutip nerer wit wit neriwaank. Hir netpor him enum hir enisesim kerek haiu mit in haiu ap te mamriakem taau. Te hir enit pewek keremem me mit han. Te ti ewenin menmen mit nar ik hir niriakem natip mit em. ¹²Nipaa mitik kiutip ke mit ne Krit hir han kitet hirak profet yaaik hirak katip kar ik: “Hekrit hekrit haiu mit ne wit Krit haiu memipin, han kaiu enuk haiu miriak enum mar ke samiyak enuk, haiu mau yain yain maam menmen weinim.” ^{13-14h} ⁱHim im hirak ketpim hiram yaaim. Ti ene mit in ne weiwik me God wisenum, te hir ap enises him me weiwik me maamrer ne mit ne Isrel au emit! Hir ap enises him weinim me mit nises him lo me nipaa te hir neweikin sip newet him yaaim me God em au emit! Hir mit ne weiwik me God hir enises him mirak werek werek keremem.

^{15j}Mit han, han kir yaaik prar prar, hir han kitet menmen yapirwe yaaim te hir ap nineinim au. Te mit han kerek han kir enuk, hir han kitet him me Kraiss werek werek au, hir natip menmen yapirwe hiram enum hir nineinim. Menmen mewaank han kir te hir netari menmen enum hir niriakem nisesim. ^{16k}Hir natip hir netike God nau han kiutip, te menmen hir niriakem nisesim meteiknai hir nemipin. Hir netike God nau han kiutip taauye! Hir nises him me Kraiss au. Hir mit enun paan tokik, hir ap nanriak menmen mei yaaim miutip taauye!

^d 1:7 1Ko 4:1 ^e 1:9 2Ti 4:3; Ta 2:1 ^f 1:10 1Ti 4:7 ^g 1:11 Jo 10:12; 1Pi 5:2; 2Ti 3:6

^h 1:13 2Ti 4:2 ⁱ 1:14 1Ti 4:7 ^j 1:15 Mt 15:11; Ro 14:20 ^k 1:16 2Ti 3:5; 1Jo 1:6, 2:4

Him ti atip mit miyapir iuwe em

2 ¹Te ti etip mit miyapir him yaaim hiram mises him me God. ²Ti atip mit enun ne mit te hir ap naam tipar wain ere hir netaritari au emit! Hir naanmampre hiras enriak menmen yaaim, te mit han natip hir yaain. Hir enwenin han kir me menmen hir nisesim. Hir enises him me Krai werek werek. Hir han tewenin mit. Mit nerekyor enun te hir han tokik enu.

³Ti atip miyapir epei enun ne mit te hir naanempre hiras me menmen yapirwe hir niriakem, enir ke miyapir nises him me God hir enriakem. Hir ap nantipan nanisesan au emit! Hir ap hanhan nanim tipar wain yapirwe au. Hir natip miyapir han menmen yaaim me God neteiknorem narkeik hir nanisesim. ⁴Hir entip miyapir nihan menmen enkepi te hir han etwenin mit nir niutip niutip netike nikerek nir. ⁵Hir natip miyapir nihan menmen, te hir naanmamre hiras te hir nanriak mit miyapir menmen yaaim. Hir ap han ekitet nantike mit nanriyanhis nanweninem au emit! Hir naanmamre menmen me winak, enriak menmen yaaim enimtau him me mit nir niutip niutip keriyen, te mit han ap nantip enun me him me Krai keremem au.

Him me mit pipep

⁶Ti atip mit pipep him manp te hir naanempre hiras nanwenin han kir me menmen hir han kitetim te hir enriak menmen yaaim keremem. ⁷Menmen yapirwe ti hiriakem, hiram mire piksa meteiknor menmen hir enisesim. Wi ti etpor menmen, ti ap ari him weinim etporem metike him yaaim mit au emit, te hir nanirtei ti mitik yaaik. ⁸Ti atip him yaaim mamkaap mit keremem, te mit han ap te nantip enun me him mit. Ti eriak menmen mar im, te mit enun nepan ne him me Krai hir yink enuk nentar hir ap natip him enun em menmen yaaim haiu mit miriakem au.

Him me wok mit

⁹Ti atip mit kerek niriak wok me mit han, te hir enises him me mit nir iuwe te hir han yaaik neriuweri me menmen yapirwe hir niriakem. Hir ap enitpor him enun au emit! ¹⁰Hir ap enkintip menmen me mit nir iuwe enipakinem au emit! Hir naanmamre menmen me mit nir iuwe enises him, te mit nir iuwe enirtei mit in niriak menmen yaaim. Mar im mit nir iuwe hir han kitet him me God kaiu kakikepai hiram yaaim.

¹¹Hi hatip menmen im hentar God epei keteiknai hirak hanhan kakikepai haiu mit yapirwe kaktaihis, te hirak keriuwet Jisas hirak kan

¹ 2:1 Ta 1:9 ^m 2:3 1Ti 3:11 ⁿ 2:5 Ef 5:22 ^o 2:7 1Ti 4:12; 1Pi 5:3 ^p 2:8 1Pi 2:15
^q 2:9 1Ti 6:1; 1Pi 2:18 ^r 2:10 Ta 1:3

ti. ¹²Menmen im meteiknai haiu emweikin sip emwet menmen enum me ti. Haiu ap emises hiras te haiu emriak menmen yaaim emises God emir ke mit nises him me God hir enriakem. Haiu emriak menmen emir im me wi haiu mepu ti im e. ¹³Haiu emriak menmen im me wi haiu memerir wi yaaim God kiau Iuwe Jisas Krai pike kaknen kakwepyapir hirekes kakteikin mit menmen mirak iuwe. ¹⁴Nipaa hirak kaa kakikepai kaktaihis, te haiu emnaaiwir menmen enum, haiu emises him me God. Hirak kerekyei haiu mepu han yaaik prar prar, haiu mit nirak keriyen. Haiu hanhan wisenum mamrekyiwek menmen yaaim. ¹⁵Ti wen etpor him im him manp enum. Mit hir ninapen nanises him im, ti etpor him manp hekrehir ke Jisas te hir enisesim. Te ti ap ewis mit hir ninan yipir nanwirek neweikin sip newetutem.

Haiu mit emises menmen yaaim

3 ¹Hekrit hekrit ti eriak han ke mit miyapir ne weiwik miutip me God te hir nanimtau him me mit ne gavman netike mit kerek naanmipre mit nerer wit wit, hir enises him mir, enriak menmen yaaim enkepi. ²Hir ap nantip enum nansiuwe him mit han au. Hir netikeri nenehan au. Hir enkiyan enu enkaap mit nanirak mit yapirwe menmen yaaim. ³Nipaa ein haiu hiras metari menmen me God haiu ap misesim au. Seten kemitaipin kari han kiau, te haiu hemkre menepam me menmen haiu miriak enum, haiu mewenin han kiau me menmen au, haiu miriak menmen mises han kiau keremem. Haiu mises menmen enum mepu weinim miriak han kiau yaaik. Haiu yink enuk meriuwe mit netenen menmen yaaim, o menmen me mit han, haiu mineini, hir nineinai haiu enun nepan keriyen.

⁴Te God kerek maain kaktaihis, hirak keteiknai haiu mit hirak yaaik hirak han teweninai. ⁵Te hirak keriuwet Jisas kan kekepai. Hirak kekepai kentar menmen yaaim haiu miriakem au. Hirak kekepai kentar hirak hanhanai. Wi nipaa mit hir nikrai neriuwe tipar, God Himin Yaaik kenipai haiu han yaaik prar prar mepu, hirak kenipai keweikinhis himin kiau te haiu mises menmen yaaim. ⁶^bGod Haai kesiuwe Himin kirak Yaaik kan kekepai iuwe kentar menmen Jisas Krai kerek kekepai kaktaihis hirak kiriakem. ⁷Hirak keriuwetek te hirak han yaaik kakikepai kakisak menmen enum haiu miriakem hirak katip haiu yaain, kehimitenai haiu eminkerek maain haiu emtikerek emu tipmain tipmain enum eik.

^{*} 2:12 1Jo 2:16; Ef 1:4 [†] 2:13 1Ko 1:7; Fl 3:20 [‡] 2:14 Ga 1:4; Sam 130:8; Eks 19:5; Diu 7:6; Esi 37:23; 1Pi 2:9; Ef 2:10 [§] 2:15 1Ti 4:12 [¶] 3:1 Ro 13:1-7; 1Pi 2:13-14 [×] 3:2 Fl 4:5
[∇] 3:3 1Ko 6:11; Ef 2:2, 5:8 ^z 3:4 Ta 1:3 ^ª 3:5 2Ti 1:9; Ef 5:26; Jo 3:5 ^ᵇ 3:6 Ap 2:17-18
[©] 3:7 Ro 3:24

⁸Menmen hi etputem hiram him yaaim. Hi hanhan te ti etpor him im him manp, te hir mit kerek nises him me God naanmampre hiras nanriak menmen yaaim. Menmen mar im hiram yaaim mamkaap mit.

⁹^dTi etike mit han yi ap eitipan einahan me him enum weinim au emit! Ti ap eises him me wit tipir o menmen nipaa mit maamrer niriakem emit! Ti etikeri yi einahan me him lo Moses kewet mit ne Isrel em au emit! Menmen mar im mamkaap mit au. Hiram mamiwaanki.

¹⁰^eMitik hak kari han ke mit han ne weiwik me God hir nisesik, te ti enerek miutip o wik. Epei au, hirak wen ap kakimtau him mit, yi mit yapirwe eiweikin sip eiwetiwek. ¹¹^fMitik kar ik han kitet menmen enum, kiriak menmen enum. Menmen enum hirak kiriakem mewepyapir hirak enuk.

Pol kewis him ham yinam

¹²^gMaain te hi esiuwe mitik Atemas o Tikikas hirak kiutip kaknen kakiun ein, ti enen waswas, te hawir ewiwen yipirakit ewit wit Nikapolis. Hi ami ahu in ere hawi hitan epei au. ¹³^hTi ekaap mitik Sinas kerek kertei menmen me lo me mit ne wit Rom. Ti ekepek ketike mitik Apolos. Ti ekepikit, te hirakit tetenen menmen me hir neiyim nanino.

¹⁴ⁱMit miyapir nau enirtei enriak yaaim enkaap mit miyapir hir han enuk me menmen enum man mewaanki. Haiu emriak menmen im emkepi te hir enu enir ke nu hir mit ap niman au, hiram mamri yapirwe. Mar im hir ap nanu weinim au, hir enises menmen me God werek werek. ¹⁵Mit miyapir kerek netikewa haiu mau in, hir nesiuwe him natip ti yaaik. Ti atip mit miyapir ein haiu matip hir yaain. Hi hanhan God han yaaik kirak kaku kaktikewi.

Mepir keremem

^d 3:9 2Ti 2:14, 16, 23 ^e 3:10 Mt 18:15-17; 2Jo 10 ^f 3:11 1Ti 6:3-5 ^g 3:12 Ef 6:21-22

^h 3:13 Ap 18:24; 1Ko 3:5-6, 16:12 ⁱ 3:14 Ef 4:28; Ta 2:14; Mt 7:19